

四庫全書

集部

欽定四庫全書

集部

御選歷代詩餘卷二十八

詳校官中書臣潘有為

侍讀臣孫球覆勘

總校官進士臣朱鈐

校對官主事臣陳文樞

謄錄監生臣姚希慶

欽定四庫全書

御選歷代詩餘卷二十八目錄

五十五字

鷓鴣天

下

辛棄疾

三十首

范成大

三首

陳三聘

三首

張孝祥

七首

程垓

朱熹 二首

張震

趙彥端 四首

姜夔 二首

陸游 二首

陳亮

許棐

嚴仁 三首

盧祖皋

二首

高觀國

二首

史達祖

洪璚

盧炳

二首

黃昇

二首

吳文英

二首

陳允平

周密 二首

張炎

石孝友 七首

李肩吾

趙君舉

汪元量

葛長庚

無名氏 二首

李清照

朱淑真

劉鼎臣妻

聶勝瓊

朱秋娘

蔡松年

二首

劉仲尹

三首

趙可

二首

韓玉

党懷英

劉著

李宴

段克己
二首

段成己
二首

元好問
十首

李治

馮子振

張翥

無名氏

吳子孝

沈周
二首

文徵明
五首

楊慎
二首

袁黃

俞彥

張紵
二首

楊宛

御選歷代詩餘卷二十八目錄

欽定四庫全書

御選歷代詩餘卷二十八

五十五字

司經局洗馬掌局事兼翰林院修撰加二級臣王奕清奉

日校刊

鷓鴣天下

鷓鴣天

別司馬漢章大監

辛棄疾

聚散匆匆不偶然三年歷徧楚山川
但將痛飲酬風月莫放離歌入管絃
紫綠帶點青錢東湖春水碧連天

明朝放我東歸去後夜相思月滿船

前調

辛棄疾

晚日寒鴉一片愁柳塘新綠却溫柔若教眼底無離恨
不信人間有白頭 腸已斷淚難收相思重上小紅樓
情知已被雲遮斷頻倚闌干不自由

前調

辛棄疾

陌上柔桑破嫩芽東鄰蠶種已生些平岡細草鳴黃犢
斜日寒林點暮鴉 山遠近路橫斜青旗沽酒有人家

城中桃李愁風雨春在溪頭薺菜花

前調

辛棄疾

撲面征塵去路遙香篝漸覺水沉銷山無重數週遭碧
花不知名分外嬌人歷歷馬蕭蕭旌旗又過小紅橋
愁邊剩有相思句搖斷吟鞭碧玉梢

前調

辛棄疾

唱徹陽關淚未乾功名餘事且加餐浮天水送無窮樹
帶雨雲埋一半山今古恨幾千般只今離合是悲歡

江頭未是風波惡，別有人間行路難。

前調

鵲湖道中

辛棄疾

一榻清風殿影涼，涓涓流水響回廊。
千章雲木鉤輶叫，十里溪風擺棹香。
衝急雨，趁斜陽，山園細路轉微茫。
倦途却被行人笑，只為林泉有底忙。

前調

鵲湖歸病起作

辛棄疾

枕簟溪堂冷欲秋，斷雲依水晚來收。
紅蓮相倚渾如醉，白鳥無言定自愁。
書咄咄，且休休，一丘一壑也風流。

不知筋力衰多少但覺新來嬾上樓

前調

辛棄疾

指點芳尊特地開風帆莫引酒船回方驚共折津頭柳
却喜重尋嶺上梅催月上喚風來莫愁瓶罄恥金壘
只愁畫角樓頭起急管哀絃次第催

前調

辛棄疾

翠木千尋上碧蘿東湖經雨又增波只因買得青山好
却恨歸來白髮多明晝燭洗金荷主人起舞客高歌

醉中只恨歡娛少無奈明朝酒醒何

前調

有所贈

辛棄疾

趁得西風汗漫遊見他歌後怎生愁事如芳草春長在
人似浮雲影不留 眉黛斂眼波流十年薄倖說揚州
明朝短棹輕衫夢只在溪南罨畫樓

前調

和趙文鼎賦雪

辛棄疾

莫上扁舟訪剡溪淺斟低唱正相宜從教犬吠千家白
且與梅成一段奇 香暖處酒醒時畫簷玉筍已偷垂

笑君解釋春風恨倩拂蠻牋只費詩

前調

重九席上

辛棄疾

戲馬臺前秋鴈飛管絃歌舞更旌旗要知黃菊清高處
不入當年二謝詩傾白酒遶東籬只於陶令有心期
明朝九日渾瀟灑莫使尊前欠一枝

前調

送歐陽國瑞入吳

辛棄疾

莫避春陰上馬遲春來未有不陰時人情輾轉閒中看
客路崎嶇倦後知梅似雪柳如絲試聽別語慰相思

短篷炊飯鱸魚熟除却松江枉費詩

前調

石門道中

辛棄疾

山上飛泉萬斛珠懸崖千丈落鼯鼯已通樵徑行還礙
似有人聲聽却無閒略約遠浮屠溪南修竹有茅廬
莫嫌杖履頻來往此地偏宜著老夫

前調

黃沙道中

辛棄疾

句裏春風正翦裁溪山一片畫圖開輕鷗自趁虛船去
荒犬還迎野婦回松共竹翠成堆要擎殘雪鬪疎梅

亂鴉畢竟無才思時把瓊瑤蹴下來

前調

元溪不見梅

辛棄疾

千丈冰溪百步雷柴門都向水邊開亂雲刺帶炊煙去
野水閒將日影來穿窈窕過崔嵬東林試問幾時栽
動搖意態雖多竹點綴風流却欠梅

前調

春日即事題毛村酒壚

辛棄疾

春日平原蒿菜花新耕雨後落羣鴉多情白髮春無奈
晚日青帘酒易賒閒意態細生涯牛欄西畔有桑麻

青裙縞袂誰家女去趁蠶生看外家

前調

辛棄疾

石壁虛雲積漸高溪聲繞屋幾週遭自從一雨花零落
却愛微風草動搖呼玉友薦溪毛殷勤野老著相邀
杖藜忽避行人去認是翁來却過橋

前調

席上和韻

辛棄疾

翰墨諸公久擅場胸中書傳許多香都無絲竹銜杯樂
却有龍蛇落筆忙閒意思老風光酒徒今有幾高陽

黃花不怯西風冷只怕詩人兩鬢霜

前調

梅

辛棄疾

桃李漫山過眼空也宜惱損杜陵翁若將玉骨冰姿比
李蔡為人在下中尋驛使寄芳容隴頭休放馬蹄鬆
吾家籬落黃昏後剩有西湖處士風

前調

讀陶詩

辛棄疾

晚歲躬耕不怨貧隻雞斗酒聚比鄰都無晉宋之間事
自是羲皇以上人千歲後百篇存更無一字不清真

若教王謝諸郎在未抵柴桑陌上塵

前調

博山寺作

辛棄疾

不向長安路上行却教山寺厭逢迎
味無味處求吾樂材不材間過此生
寧作我豈其鄉人間走徧却歸耕
一松一竹眞朋友山鳥山花好弟兄

前調

祝良顯家牡丹二首

辛棄疾

占斷雕欄只一株春風費盡幾工夫
天香夜染衣猶濕國色朝酣醉未蘇
嬌欲語巧相扶不妨老幹自扶疎

恰如翠幙高堂上來看紅衫百子圖

前調

辛棄疾

濃紫深黃一畫圖中間更有玉盤盂
先裁翡翠裝成蓋更點胭脂染透酥
香澌灩錦模糊主人長得醉工夫
莫攜弄玉闌邊去羞得花枝一朵無

前調

送范先
之秋試

辛棄疾

白苧新袍入嫩涼春蠶食葉響迴廊
禹門已準桃花浪月殿先收桂子香
鵬北海鳳朝陽又攜書劍路茫茫

明年此日青雲上笑看人間舉子忙

前調

辛棄疾

去歲花枝把酒杯雪中曾見牡丹開而今紈扇薰風裏
又見疎枝月下梅歡幾許醉方回明朝歸路有誰催
低聲待向他家道帶得歌聲滿耳來

前調

辛棄疾

是處移花是處開古今興廢幾池臺背人翠羽偷魚去
抱蕊黃鬚趁蝶來掀老甕撥新醅客來且盡兩三杯

日高盤饌供何晚市遠魚鮭買未回

前調

山行

辛棄疾

誰共春光管日華朱朱粉粉野蒿花間愁投老無多子
酒病而今較減些山遠近路橫斜正無那處管絃譚
去年醉後猶能記細數溪邊第幾家

前調

吳子似
過秋水

辛棄疾

秋水長廊水石間有誰來共聽潺潺羨君人物東西晉
分我詩名大小山窮自樂晚方閒人間路窄酒杯寬

看君不了癡兒事又似風流靖長官

前調

辛棄疾

萬事紛紛一笑中淵明把菊對秋風細看爽氣今猶在
惟有南山一似翁情味好語言工三賢高致古今同
誰知止酒停雲老獨立斜陽數過鴻

前調

范成大

蕩漾西湖采綠蘋揚鞭南隸滾紅塵桃花暖日濃濃笑
楊柳光風淺淺顰章貢水鬱孤雲多情爭似桂江春

崔徽卷袖瑤姬夢縱自相逢不是真

前調

范成大

嫩綠重重看漸成曲闌幽檻小紅英酴醾架上蜂兒鬧
楊柳行間燕子輕 春婉婉客飄零殘花淺酒片時清
一杯且買明朝事送了斜陽月又生

前調

雪梅

范成大

壓蕊拈鬚粉作團疎香辛苦顫朝寒須知風月尋常見
不似層層帶雪看 春髻重曉眉彎一枝斜並縷金幡

酒紅不解東風凍驚怪釵頭玉燕乾

前調

陳三聘

酒暈從教上臉丹春愁何事點眉山都將別後深深意
且向尊前細細看多少恨說應難粉中空染淚斑斑
熏猊箏鴈長閒却明月樓心夜正寒

前調

雪梅
次韻

陳三聘

翦碎霜綃巧作團玉纖特地破朝寒疎花好向釵橫見
瘦影難敲月墮看將舊恨入眉彎不須多樣縷金襴

當時千點東風淚怪見妝成粉未乾

前調

陳三聘

昨夜東風怨不成曉來猶自埽殘英半酸梅子連枝重
無力楊花到地輕情易感淚先零玉虬香冷更淒清
事如芳草絲絲遠恨比浮雲冉冉生

前調

張孝祥

可意黃花人不知黃花標格世間稀園葵浥露迎朝日
檻菊經霜媚夕霏芍藥好是金絲綠藤紅刺引薔薇

姚家別有神仙品似著天香染御衣

前調

張孝祥

又向荊州住半年西風催放五湖船來時露菊團金顆
去日池荷翦綠錢斟別酒扣離舷一時賓從最多賢
今宵拚醉花迷坐後夜相思月滿川

前調

張孝祥

月地雲堦歡意闌仙姿不合住人間驂鸞已恨車塵遠
泣鳳空餘燭影殘情脉脉淚珊珊梅花音信隔關山

只因楚雨清留夢不耐吳霜綠易斑

前調

詠桃
菊花

張孝祥

桃換肌膚菊換妝只疑春色到重陽解將天上千年豔
翻作人間九日黃新豔冶舊風光東籬却似武陵鄉
尊前醉眼偷相顧錯認陶潛是阮郎

前調

上元
啓醮

張孝祥

詠徹瓊章向夜闌天移星斗下人間九光倒影騰香簡
一氣回春達絳壇瞻北闕祝南山遙知仙仗簇清班

何人曾侍傳柑讌翡翠簾開識聖顏

前調

春情

張孝祥

日日春樓醉夢中不知樓外已春濃杏花未遇疎疎雨
楊柳初搖短短風扶畫鷁躍花驄湧金門外小橋東
行行又入笙歌裏人在珠簾第幾重

前調

餞劉共甫

張孝祥

憶昔追遊翰墨場武夸仙伯較文章琅函奏號銀臺省
檀筆書名御苑牆經十載過三湘橫眉麗錦照傳觴

醉餘吐出胸中墨只欠彭宣到後堂

前調

寄少城

程垓

淚濕芙蓉城上花片飛何事苦參差鎖深不奈鶯無語
巢穩爭如燕有家情未老鬢先華可憐各自淡生涯
楊花不解知人意猶自沾泥也學他

前調

江檻詞

朱熹

暮雨朝雲不自憐放教春漲綠浮天祇今畫閣臨無地
宿昔新詩滿繫船青鳥外白鷗前幾生香火舊因緣

酒闌山月移雕檻歌罷江風拂玳筵

前調

朱熹

已分江湖寄此生長蓑短笠任陰晴鳴橈細雨滄洲遠
繫舸斜陽畫閣明奇絕處未忘情幾時還得去尋盟
江妃空許捐雙佩漁父何勞笑獨醒

前調

張震

橫索橋邊景最佳綠波清淺見瓊沙銜泥燕子迎風絮
得食魚兒趁浪花春已暮日初斜畫船簫鼓是誰家

蘭橈欲去空留戀醉倚闌干看晚霞

前調

白鷺亭作

趙彥端

天外秋雲四散飛波間風艇一時歸他年淮水東邊月
猶為登臨替落暉誇客勝數星稀晚寒颯颯動青衣
酒行不盡清光意輸與漁舟睡釣磯

前調

趙彥端

憶醉君家倚翠屏年年相喜鬢毛青誰知緩步從天下
猶許清彈此地聽揮羽扇寫鵝經使星何似老人星

幾時一試薰風手今日桐陰又滿庭

前調

楊蘭

趙彥端

兩兩青螺綰額傍彩雲齊會下巫陽俱飛蛺蝶元相逐
並蒂芙蓉本自雙翻彩袖舞霓裳點風飛絮恣輕狂
花神只恐難留住早晚承恩入未央

前調

趙彥端

寂寂深幃起暗塵清歌緩響自回春月和燈市雲間墜
人對梅花雪後新仙掌露舞衣雲酒慵微覺醉鬟輕

洞房不厭陽臺雨，乞與遊人弄晚晴。

前調

姜夔

憶昨天街預賞時，柳慳梅小未教知。而今正是歡遊夕，
却怕春寒自掩扉。簾寂寂，月低低，舊情惟有絳都詞。
芙蓉影暗三更後，臥聽鄰娃笑語歸。

前調

苕溪記
所見

姜夔

京洛風流絕代人，因何風絮落溪津。籠鞵淺出鴉頭鞵，
知是凌波縹緲身。紅乍笑，綠長顰，與誰同度可憐春。

鴛鴦獨宿何曾慣化作西樓一縷雲

前調

陸游

梳髮金盤剩一窩畫眉鸞鏡暈雙蛾人間何處無春到
只有伊家獨占多微步處奈嬌何春衫初換麴塵羅
東鄰鬪草歸來晚忘却新傳子夜歌

前調

薛公肅
席上作

陸游

南浦聲中兩玉人誰知重見楚江濱憑教後苑紅牙板
引上西川綠錦茵纔淺笑却輕顰淡黃楊柳又催春

情知言語難傳恨不似琵琶道得真

前調

陳亮

花拂開干柳拂空花枝綽約柳鬟鬆蝶翻淡碧低邊影
鶯轉濃香杪處風深院落小簾櫳尋芳猶憶舊相逢
橋邊攜手歸來路踏皺殘花幾片紅

前調

許棐

翠鳳金鸞繡欲成沉香亭下款新晴綠隨楊柳陰邊去
紅踏桃花片上行鶯意緒蝶心情一時分付小銀箏

歸來欲醉花柔困月濾紗牕約半更

前調

嚴仁

行盡春山春事空別愁離恨滿江東三更鼓潤官樓雨
五夜燈殘客舍風寒淡淡曉朧朧黃雞催斷丑時鐘
紫騮嚼勒金銜響衝破飛花一道紅

前調

嚴仁

一曲危絃斷客腸津橋捩柁轉牙檣江心雲帶蒲帆重
樓上風吹粉淚香
瑤草碧柳芽黃載將離恨過瀟湘

請君看取東流水方識人間別意長

前調

嚴仁

多病春來事事慵偶因撲蝶到庭中落紅萬疊花經雨
斜碧千條柳困風深院宇小簾櫳幾年離別惜相逢
擎觴未飲心先醉為有春愁似酒濃

前調

盧祖皋

纖指輕拈小砑紅自調宮羽按歌重寒餘芍藥欄邊雨
香落茶蘼架底風閒意態小房櫳丁寧須滿玉西東

一春醉得鶯花老不似年時怨玉容

前調

盧祖皋

庭綠初圓結蔭濃香溝收拾樹梢紅池塘少歇鳴蛙雨
簾幙輕迴舞燕風春又老笑誰同淡煙斜日小樓東
相思一曲臨風笛吹過雲山第幾重

前調

高觀國

有約湖山却解襟晝眠占得一庭深樹邊風色寒滋味
愁裏年華鴈信音驚楚夢聽瑤琴黃花尚可伴孤斟

斷雲萬一成疎雨却向湖邊看晚陰

前調

高觀國

翦翠衫兒穩四停最憐一曲鳳簫吟同心羅帕輕藏素
合字香囊半影金春思悄畫牕深誰能拘束少年心
鶯來驚碎風流膽踏動櫻桃葉底鈴

前調

衛縣道
中有懷

史達祖

鴈足無書古塞幽一程煙草一程愁帽簷塵重風吹野
帳角香銷月滿樓情思亂夢魂浮綳裙多憶敝貂裘

官河水靜闌干暖徙倚斜陽怨晚秋

前調

洪璚

意態嬋娟畫不如瑩然初日照芙蓉笑捐瓊珮遺交甫
肯把文梭擲幼輿花上蝶水中鳬芳心密意兩相於
情知不作庭前柳到得秋來日日疎

前調

盧炳

秋月明眸兩鬢濃衫兒貼體縐輕紅清聲宛轉歌金縷
纖手殷勤捧玉鐘嬌姪姪語惺忪酒香微度透羞容

劉郎莫恨相逢晚且喜桃源路已通

前調

題廣文舍
竹外梅花

盧炳

閣雨浮雲寒尚輕商量雪意未全成莫嫌竹外蕭然處
忽有幽香透鼻清詩興逸酒魂醒主人留客更多情
不辭滿引成癡客且為梅花醉一觥

前調

暮春

黃昇

沉水香消夢半醒斜陽恰照竹間亭戲臨小草書團扇
自揀殘花插淨瓶鶯宛轉燕丁寧晴波不動晚山青

玉人只怨春歸去不道槐雲綠滿庭

前調

張園

黃昇

雨過芙蕖葉葉涼
摩挲短髮照橫塘
一行歸鷺拖秋色
幾樹鳴蟬餞夕陽
花影畔柳陰傍
微雲淡月又昏黃
風流不在談鋒勝
袖手無言味最長

前調

化度寺

吳文英

池上紅衣伴倚闌
樓鴉常帶夕陽還
微雲度雨疎桐落
明月生涼寶扇閒
鄉夢窄水天寬
小牕愁黛淡秋山

吳鴻好為傳歸信楊柳閨門屋數間

前調

閨中秋

吳文英

丹桂花開第二番東籬展却宴期寬人間寶鏡離仍合
海上仙槎去復還分不盡半涼天可憐閒剩此嬋娟
素娥未隔三秋夢贏得今宵又倚闌

前調

陳允平

錦幄沉沉寶篆殘惜春無語倚闌干庭前芳草空惆悵
簾外飛花自往還金屋靜玉簫閒一尊芳酒駐紅顏

東風落盡酴醾雪滿地清香夜不寒

前調

清明
二首

周密

燕子時時度翠簾柳眠猶未褪香絲落花門巷家家雨
新火樓臺處處煙情脉脉恨厭厭東風吹動畫秋千
刺桐開盡鶯聲老無奈春風祇醉眠

前調

周密

相傍清明情更慳閉門空自惜花殘海棠半坼難禁雨
燕子初歸不奈寒金鴨冷錦鴛閒銀缸空照小屏山

翠羅袖薄東風峭獨倚西樓第幾闌

前調

張炎

樓上誰將玉笛吹山前水闊暝雲低
勞勞燕子人千里
落落梨花雨一枝
修禊節賣餚時
故鄉惟有夢相隨
夜來折得江頭柳
不是蘇堤也皺眉

前調

石孝友

別後應憐信息疎
西風幾度到庭梧
夜來縱有鴛鴦夢
春去空餘蛺蝶圖
煙樹遠塞鴻孤
垂垂天影帶平蕪

憑誰寫取相思曲寄與馮川鄭小奴

前調

石孝友

玉燭調元泰律均迎長嘉節屬芳辰雲如惜雨鈎牽雪
梅不禁風漏洩春天意好物華新偷閒贏取酒邊身
太平朝野都無事且與鶯花作主人

前調

石孝友

一別音塵兩杳然不堪虛度菊花天驚秋遠鴈橫斜字
噪晚哀蟬斷續絃好消息惡姻緣涼宵如水復如年

夢魂不怕風波險飛過江西阿那邊

前調

石孝友

收拾眉尖眼尾情夜來真箇夢傾城鴛鴦有底情難盡
蝴蝶無端夢易驚愁一掬月三更綠幃應好睡輕盈
知他莫有相憐分輾轉尋思直到明

前調

石孝友

花漏聲乾月隱牆瑣灰迎曉透新陽物情漸逐雲容好
歡意偏隨日脚長山作鼎玉為漿壽杯叢處豔梅妝

醉鄉路接華胥國應夢朝天侍赭黃

前調

石孝友

一夜冰澌滿玉壺五更喜氣動洪爐門前桃李如鱗集
庭下芝蘭看鯉趨 泉脉動草心蘇日長添得繡工夫
試探補袞彌縫手真箇曾增一線無

前調

中秋夜

石孝友

霜葉披殘露顆傳明星著地月流天不辭獨賞窮今夜
應為相逢憶去年 辜窈窕負嬋娟誰知兩處照孤眠

姮娥不怕離人怨有甚心情獨自圓

前調

李肩吾

綠色吳牋覆古苔
濡毫重擬賦幽懷
杏花簾外鶯將老
楊柳樓前燕不來
倚玉枕墜瑤釵
午牕輕夢遶秦淮
玉鞭何處貪遊冶
尋徧春風十二街

前調

趙君舉

約略應飛白玉盤
明樓漸放滿輪寒
天垂萬丈清光外
人在三秋爽氣間
閒葉吹想風鬟
浮空彷彿女乘鸞

此時不合人間有盡入嵩山靜夜看

前調

汪元量

潏潏湖光綠正肥
蘇堤十里柳絲飛
輕便燕子低低舞
小巧鶯兒恰恰啼
花似錦酒成池
對花對酒兩相宜
水邊莫話長安事
夢斷蘭亭修禊時

前調

葛長庚

雨過山花向晚香
煙絲空翠柳微茫
舊家丹竈何人葛
今日簾泉阿老黃
犀角枕象牙牀
椰心織簟畫生涼

杯行無筭何曾醉不覺羅浮日月長

前調

無名氏

擬上高樓欲散愁奈愁隨我上高樓經行眼底青山徧
檢點簪邊白髮稠歸去去去休休劉伶應是醉鄉侯
蒼煙起處孤雲白人若如雲儘自由

前調

佳人

無名氏

全似丹青搵染成更將何物比輕盈雪因舞態羞頻下
雲為歌聲不忍行螺髻小鳳鞦輕天邊斗柄又斜橫

水晶庭柱琉璃帳客去誰同看月明

前調

宋媛
李清照

盡日蕭蕭上瑣牕
梧桐應恨夜來霜
酒闌更喜團茶苦
夢斷偏宜瑞腦香
秋已盡日猶長
仲宣懷遠更淒涼
不如隨分尊前醉
莫負東籬菊蕊黃

前調

宋媛
朱淑真

獨倚闌干晝日長
紛紛蜂蝶鬬輕狂
一天飛絮東風惡
滿路桃花春雨香
當此際意偏傷
萋萋芳草傍池塘

千鍾尚欲偕春醉
幸有荼蘼與海棠

前調

劉鼎臣妻

金屋無人夜翦繒
寶釵翻過齒痕輕
臨風執手殷勤贈
襯與蕭郎兩鬢青
聽囑付好看承
千金不抵一時情
明年宴罷瓊林晚
酒面微紅相映明

前調

寄別
李生

宋妓
聶勝瓊

玉慘花愁出鳳城
蓮花樓下柳青青
清尊一曲陽關後
別箇人人第五程
尋好夢夢難成
有誰知我此時情

枕邊淚共階前雨隔箇牕兒滴到明

前調

宋妓
朱秋娘

梅妒疎香雪如輕遠山長共畫眉青尊前無復歌金縷
夢覺惟餘月半明魚與鴈兩浮沉淺顰低笑總關心
相思恰似江南柳一夜東風一夜深

前調

蔡松年

解語宮花出畫簷酒尊風味為花甜誰憐夢好春如水
可奈香餘月入簾春漫漫酒厭厭曲終新恨到眉尖

此生願化雙瓊柱得近春風暖玉纖

前調

蔡松年

秀樾橫塘十里香水花曉色靜年芳
臘脂雪瘦熏沉水
翡翠盤高走夜光
山黛遠月波長
暮雲秋影蘸瀟湘
醉魂應逐凌波夢
分付西風此夜涼

前調

劉仲尹

騎鶴峰前第一人不應著意怨王孫
當年豔態題詩處
好在香痕與淚痕
調鴈柱引蛾顰
綠牕絃索合秦箏

砌臺歌舞陽春後明日朱扉幾斷魂

前調

劉仲尹

樓宇沉沉翠幾重
轆轤亭下落梧桐
川光帶晚虹垂雨
樹影涵秋鵲喚風
人不見思何窮
斷腸今古夕陽中
碧雲猶作山頭恨
一片西飛一片東

前調

劉仲尹

壁月池南翦木樨
六朝宮袖窄中宜
新聲感巧蛾顰黛
纖指移箏鴈著絲
朱戶小畫簾低細
香輕夢隔涪溪

西風只道悲秋瘦却是西風未得知

前調

趙可

金絡閒穿御路楊青旗遙認醉中鄉可人自有迎門笑
下馬何妨索酒嘗春正好日初長一尊容我駐風光
歸來想像行雲處薄雨霏霏灑面涼

前調

集句

趙可

十頃平波溢岸青草香沙暖水雲晴輕衫短帽垂楊裏
楚閨相看別有情揮彩筆倒銀瓶花枝照眼句還成

老來漸減金釵興回施春光與後生

前調

韓玉

披拂芝蘭便斷金頓成南北豈勝任三年尊酒半生話
千里雲山一寸心休悵望莫登臨夢魂何處不相尋
愁腸欲問愁多少未比湘江煙水深

前調

七夕

党懷英

雲步淩波小鳳鈎年年星漢踏清秋只緣巧極稀相見
底用人間乞巧樓天外事兩悠悠不應也作可憐愁

開簾放入窺牕月且盡新涼睡未休

前調

劉著

雪照山城玉指寒一聲羌管怨樓間江南幾度梅花發
人在天涯鬢已斑星點點月團圓倒流河漢入杯盤
翰林風月三千首寄與吳姬忍淚看

前調

李宴

苒苒萋萋雨後村芳塵不到五侯門曾隨曉淚撩詩思
又向春風入燒痕春去後憶王孫啼紅南浦記芳溫

夕陽樓外連天遠，乞與騷人怨楚魂。

前調

九日寄友
兼簡二弟

段克己

點檢笙歌上小樓，西風簾幙卷清秋。
綠醅輕泛紅蕖好，黃菊羞簪白髮稠。
今古恨，去悠悠，無情汾水自西流。
澹煙衰草斜陽外，并作登臨一段愁。

前調

段克己

颿颿輕舟送上溪，何時柳樹已成圍。
貪看歸鳥投林急，不覺殘花入座飛。
蘭櫂舉，麴塵霏，新荷挽斷有餘絲。

酒酣却對青山笑面目蒼然不入時

前調

段成已

行徹南溪到北溪山迴萬馬合長圍花如有舊迎人笑
雲自無心出岫飛揮醉墨帶煙霏婆娑醉舞拂青絲
昔時心賞今猶在但恐風流異昔時

前調

段成已

瀑布巖前水滿溪青陽廟下四山圍歌殘白雪雲猶佇
舞落烏紗鳥忽飛迷晚色鎖晴霏野花如綺柳如絲

一尊不惜頽然醉明日重來已後時

前調

隆德
故宮

元好問

臨錦堂前春水波蘭皋亭下落梅多三山宮闕空銀海
萬里風埃暗綺羅雲子酒雪兒歌留連風月共婆娑
人間更有傷心處奈得劉伶醉後何

前調

蓮

元好問

瘦綠愁紅倚暮烟露華涼冷洗嬋娟含情脉脉知誰怨
顧影依依意自憐風送雨水連天凌波無夢夜如年

何時北渚亭邊月狼藉秋香拂畫船

前調

與欽叔京甫夜飲

元好問

樓上歌呼倒接羅樓前分手却相攜
雨前雨後花枝減
州北州南酒價低
憐木鴈笑醺雞鶴長
鳬短幾時齊
醉來門外三竿日臥聽春泥過馬蹄

前調

中秋飲蓮花白

元好問

月窟秋清桂葉丹
仙家釀熟水芝殘
香來寶地三千界
露入金莖十二盤
天澹澹夜漫漫
五湖豪客酒腸寬

醉來獨跨蒼鸞去太華峰前玉井寒

前調

元好問

候館燈昏雨送涼小樓人靜月侵牀多情却被無情惱
今夜還如昨夜長金屋暖玉爐香春風都屬富家郎
西園何限相思樹辛苦梅花候海棠

前調

元好問

翡翠鴛鴦不自由鏡中鸞舞只堪愁庭前花是同心樹
山際泉分兩下流金絡馬木犀舟誰家紅袖水西樓

春風殢笑官橋柳吹盡香絲不放休

前調

元好問

小字繚綾寫欲成印來眉黛綠分明水流刻漏何曾住
玉作彈碁儘未平愁易積夢頻驚聞衾敲枕覺霜清
月明不放寒林穩夜夜烏啼徹五更

前調

元好問

天上腰肢說館娃眼中金翠有芳華行雲著意留歌扇
遠柳無情隔鈿車周昉畫洛陽花一枝濃豔落誰家

春風恨煞如年夜庭樹陰陰欲暮鴉

前調

讀李崖州詩有感

元好問

姚宋明光到此家爭教老作賈長沙碧山也要崖州住
百匝千遭遶郡衙南苑月曲江花青雲軒蓋滿京華
新生黃雀君休笑占了春光却被他

前調

元好問

百轉流鶯出畫籠一雙蝴蝶帶芳叢葱蘢花透纖纖月
暗淡香搖細細風情不盡夢還空歡緣心事淚痕中

長安西望堪腸斷
霧閣雲牕又幾重

前調

飲蓮花白

李治

太乙滄波下酒星
露醺秘訣出仙扃
情知天上蓮花白
壓盡人間竹葉青
迷曉色散秋聲
兵厨曉溜玉泠泠
楚江雲錦三千頃
笑煞靈均語獨醒

前調

贈妓珠簾秀

馮子振

十二闌干映遠眸
醉鄉空斷楚天秋
鰕鬚影薄微微見
龜背紋輕細細浮
香霧斂翠雲收
海霞為帶月為鉤

夜來捲盡西山雨不著人間半點愁

前調

張翥

乍學琵琶已斷腸錦絳銀甲玉懸璫春風瓊樹聲逾穩
秋水芙蓉字亦香微斂笑淺勻妝何須重覓杜韋娘
休教月底清歌去怕趁行雲上鳳凰

前調

聽楊玉娥唱
故人撰曲

無名氏

煙柳風花錦簇筵霜芽露葉玉裝船誰知皓齒纖腰會
只在輕衫短帽邊啼粉靨咽冰絃舊遊一去更無傳

詞人彩筆佳人口再喚春風到眼前

前調

吳子孝

客館蹉跎歲已殘
擁爐還覺敝裘寒
茅齋霜濯松千尺
漁浦波環竹萬竿
嗟暮景守微官
時時歸夢到吳關
石湖爛漫梅花發
雪後何人載酒看

前調

沈周

頭髮鬢鬢積漸彫
詩逋畫欠未勾消
大都教我生勞碌
一半因他解寂寥
山淡淡水迢迢
門前秋色自天描

清風儘許奚囊括明月還憑拄杖挑

前調

春柳

沈周

媚在輕柔媚娜中幾枝斜映驛亭紅微煙啅雀金猶嫩
細雨藏鴉綠未濃攀傍岸折隨風管人離別有何功
開花更是無聊賴一朵西飛一朵東

前調

秋鴈

文徵明

萬里南來道路長更將秋色到衡陽江湖滿地皆增綴
何處西風有稻粱隨落日渡清湘晚鴉衝突不成行

相呼莫向南樓過應有佳人惱夜涼

前調

秋風

文徵明

拂草揚波復振條白雲千里鴈行高時飄墜葉驚寒雨
還入長松捲夜濤情漠漠意蕭蕭縑帷紈扇總無聊
潘郎愁鬢添清雪滿鏡蕭疎怕見搔

前調

秋月

文徵明

黯黯溶溶缺又盈秋清寒重轉分明玉關羈鴈年年度
桂殿寒潮夜夜生積玉氣溢金精照人離別更多情

長風不斷吹秋至何處江樓有笛聲

前調

芙蓉

文徵明

抹雨凝脂洗玉翹幽芳偏向曲池坳錦城月落春常在
仙掌風微露未消揚桂楫倚蘭橈涉江無那美人遙
自家閒澹甘遲暮不逐東風一樣飄

前調

秋蟬

文徵明

抱葉清吟玉宇涼微風吹起暮聲長
九秋服食空寒露萬木陰森自夕陽
藏密陰引圓吭不知身後有螳螂

蛺蝶來却是清虛體相伴文貂沐寵光

前調

元宵後
獨酌

楊慎

千點寒梅曉角中一番春信畫樓東收燈庭院遲遲月
落索秋千翦翦風魚鴈杳水雲重異鄉節序恨匆匆
當歌幸有金陵子翠掌清尊莫放空

前調

西莊

楊慎

秋水澄清勝酒醅野煙籠樹似樓臺彈聲林鳥山和尚
寫字寒蟲水秀才乘興去興闌回夕陽影裏記徘徊

欽定四庫全書

御選歷代詩餘
卷二十八

三

正思修禊明年約無奈鳴騶得得催

前調

題村史
屋壁

袁黃

袖手春林散翠鬟莫嫌此地少青山
酒逢社日添酬應
花到開時費往還
松老大竹平安
柴荆雖設不長關
旁人方訝茅齋窄
鵲戶蜂房去半間

前調

瓶梅

俞彥

淺渚明沙聚碧流依然春信鎖枝頭
金徽昨夜初賡曲
羌笛何人更倚樓
朝露重晚煙浮
幾回花外月如鉤

而今貯向紗牕裏點點寒香入夢愁

前調

張 縝

山路崎嶇照葦叢朱光隨地散金蟲
露衣暗濕霏霏霧捲幔涼生細細風
登虎豹度蒙蒙泉聲幾處響玲瓏
却思睡熟松牕月敲枕聽殘遠寺鐘

前調

張 縝

雨過鳴蟬斷續聞石梁秋水漲溪痕
秋風銀鹿無來信落日金牛銷旅魂
登小閣倒孤尊故山回首暮煙昏

卷二十八
令人苦憶湖邊舍綠蔓黃花正繞門

前調

七夕後一日詠織女

明妓楊宛

迢遞佳期又早休鵲橋無計為遲留臨風吹散鴛鴦侶
對月空思鸞鳳儔從別後兩悠悠封題錦字倩誰投
金梭慵整添愁緒淚逐銀河不斷流

仰選歷代詩餘卷二十八

欽定四庫全書

集部

御選歷代詩餘卷二十九

詳校官中書臣潘有為

侍讀臣孫球覆勘

總校官進士

臣

朱鈴

校對官主事

臣

陳文樞

謄錄監生

臣

姚希慶

欽定四庫全書

選歷代詩餘卷二十九目錄

起五十五字至五十六字

河傳 又一體

溫庭筠

前調 又一體

溫庭筠 二首

前調 又一體

李珣

前調又一體

李珣

前調又一體

孫光憲

前調又一體

劉基

遍地花

毛滂

品令 又一體

周邦彥

方千里

楊澤民

陳允平

詹思新

晏殊 二首

亭前柳

朱雍 二首

雨中花 又一體

劉基

張大烈

夜行船 又一體

謝絳

歐陽修

毛滂 二首

前調 又一體

孫浩然

醉落魄

戴復古

芳草渡

馮延巳

望遠行 又一體

南唐李煜

金鳳鈞

又一體

鼎補之

木蘭花

又一體

韋莊

步蟾宮

汪存

杏花天

又一體

侯寔

玉樓人

晏殊

金蓮繞鳳樓

宋徽宗

徵招調中腔

王安中

鼓笛令

黃庭堅

浪淘沙 又一體

杜安世

前調 又一體

杜安世

涼州令 又一體

柳永

思歸樂

柳永

憶人人

晏殊 二首

怨王孫 又一體

李清照

一七令

魏扶

楊慎 二首

月照梨花 又一體

黃昇

鵲橋仙

歐陽修

張先

蘇軾
二首

黃庭堅

秦觀

李之儀

毛滂 二首

杜安世

舒亶

葛勝仲 二首

謝逸

周邦彥

李祁

呂渭老

向子諲 二首

趙長卿

辛棄疾 三首

范成大

張孝祥 二首

趙彥端 四首

管鑑

張鎡

陸游
三首

楊炎
二首

張輯

謝懋

黃機
二首

劉光祖

史達祖

吳潛

趙以夫

盧炳

沈端節

潘枋

蘇氏

嚴蘖

元好問

劉因

曹伯啓

張埜

滕賓

周用
二首

董斯張

沈士鏞

項蘭貞

王微

音

御

御選歷代詩餘卷二十九目錄

欽定四庫全書

選歷代詩餘卷二十九

起五十五字
至五十六字

司經局洗馬掌局事兼翰林院修撰加二級臣王奕清奉

校刊

河傳

又一體雙調
五十五字

河傳

溫庭筠

湖上聞望雨蕭蕭
煙浦花橋路遙
謝娘翠蛾愁不銷
終

朝夢魂迷晚潮
蕩子天涯歸棹遠春已晚鶯語空腸
斷若耶溪溪水西柳堤不聞郎馬嘶

前調

又一體

溫庭筠

江畔相喚曉妝鮮
仙景箇女採蓮請君莫向那岸邊
少年好花新滿船
紅袖搖曳逐風暝垂玉腕腸向柳絲
斷浦南歸浦北歸
莫知晚來人已稀

前調

溫庭筠

同伴相喚杏花稀
夢裏每愁依違仙客一去燕已飛不

歸淚痕空滿衣 天際雲鳥引情遠春已晚煙靄度南苑
雪梅香柳帶長小娘轉令人意傷

前調

又一體

李珣

去去何處迢迢已楚山水相連朝雲暮雨依舊十二峰
前猿聲到客船 愁腸豈異丁香結因離別故國音書
絕想佳人花下對明月春風恨應同

前調

又一體

李珣

春暮微雨送君南浦愁斂雙蛾落花深處啼鳥似逐離

歌粉檀珠淚和 臨流更把同心結情哽咽後會何時
節不堪回首相望已隔汀洲鶻聲幽

前調

又一體

孫光憲

風颭波斂團荷閃閃珠傾露點木蘭舟上何處吳娃越
豔藕花紅照臉 大堤狂煞襄陽客煙波隔渺渺湖光
白身已歸心不歸斜暉遠汀瀟鷺飛

前調

又一體

劉基

江風吹過水生紋煙裏斜陽半曛雨聲不堪客耳聞紛

紛夢魂迷斷雲 夢斷天涯歸路杳 天欲曉殘月窺牕
小 木蘭舟蘆葦秋汀洲岸花相伴愁

偏地花

雙調五
十五字

偏地花

毛滂

白玉闌邊自凝佇 滿枝頭彩雲雕霧甚芳菲 繡得成團
砌 合出韶華好處 暖風一笑盈盈吐 檀心向誰分付
莫與他西子精神不枉了東君雨露

品令

又一體雙調
五十五字

品令

梅

周邦彥

夜闌人靜月痕寄梅梢疎影簾外曲角闌干近舊攜手
處花霧寒成陣應是不禁愁與恨縱相逢難問黛眉
曾把春衫印後期無定腸斷香消盡

前調

方千里

露晞煙靜寂寥轉梧桐寒影天際歷歷征鴻近被風吹

散聲斷無行陣 秋思客懷多少恨漫厭厭誰問暈殘
蘭炷香銷印夢魂長定愁伴更籌盡

前調

詠基

楊澤民

日長風靜濃香在珠簾花影茶具對著明牕近未排角
勢鴉鷺先分陣 雙疊遠山非有恨正藏機休問便如
啜采爭堂印局翻無定有倖君須盡

前調

陳允平

玉壺塵靜蟾光透一簾疎影偏愛水月樓臺近畫簾獨

倚風度寒香陣 猶記曲江煙水恨歎淒涼誰問夜深
沙背霜痕印嚼花拚醉枝上春無盡

睿恩新

雙調五
十五字

睿恩新

晏殊

芙蓉一朵霜秋色迎曉露依依先拆似佳人獨立傾城
傍朱檻暗傳消息 靜對西風脉脉金蕊綻粉紅如滴
向蘭堂莫厭重新免清夜微寒漸逼

前調

晏殊

紅絲一曲傍堦砌
珠露下獨呈纖麗
翦鮫綃碎作香英
分綵線簇成嬌蕊
向晚羣花新醉放
朶朶似延秋意
待佳人插向釵頭
更裊裊低臨鳳髻

亭前柳

雙調五
十五字

亭前柳

梅二
首

朱雍

拜月南樓上面
嬋娟恰對新妝
誰凭闌干處
笛聲長追

往事徧淒涼
看素質臨風消瘦盡粉痕輕依舊真香
瀟灑春塵境過橫塘度清影在回廊

前調

朱雍

竚立東風裏放纖手淨試梅妝
睂暈輕輕畫遠山長添
新恨更淒涼
嘗憶得驛亭人別後尋春去盡是幽香
歸路臨清淺在寒塘同水月照虛廊

雨中花

又一體雙調
五十五字

雨中花

旅懷

劉基

月入疎松光的灤淡煙鎖江城夜寂問何處無愁人間
今古莫作他鄉客 月裏青鸞空有翼杳不見嫦娥消
息北斗縱橫銀河清淺重露成涓滴

前調

夏景

張大烈

春光流去新光續景推遷嫩槐新竹看雨漲溪流高懸
瀑布千尺寒飛玉 試對青山迎翠色見萬嶂樹陰濃
綠畫舫迎風紅妝調管嬌奏雲和曲

夜行船

又一體雙調五十五
字中間平仄小異

夜行船

謝絳

昨夜佳期初共鬢雲低翠翹金鳳尊前和笑不成歌意
偷傳眼波微送草草不容成楚夢漸寒深翠簾霜重
相看送到斷腸時月西斜畫樓鐘動

前調

歐陽修

滿眼東風飛絮催行色短亭春暮落花流水草連雲看

看是斷腸南浦 檀板未終人去去扁舟在綠楊深處
手把金尊難為別更那聽亂鶯疎雨

前調

雨夜泊
吳江

毛滂

寒滿一衾誰共夜沉沉醉魂朦鬆雨呼煙喚付淒涼又
不成那些好夢 忽明日煙江暝矇扁舟繫一行蝦蟇
李鷹生事水瀾漫過鱸船再三目送

前調

餘英溪
泛舟

毛滂

弄水餘英溪畔綺羅香日避風慢桃花春浸一篙深畫

橋東柳低煙遠
漲綠流紅空滿
眼倚蘭橈舊愁無限
莫把鴛鴦驚飛去
要歌時少低檀板

前調

又一體

孫浩然

何處采菱歸
暮隔宵煙菱歌輕舉
白蘋風浸月華寒影
朦朧半和梅雨
脉脉相逢心似許
扶蘭棹黯然凝竚
遙指前村隱隱煙樹
含情背人歸去

醉落魄

雙調五
十五字

醉落魄

九日黃鶴山登高

戴復古

龍山行樂何如今日登黃鶴風光正要人酬酢欲賦歸
來莫問淵明錯江山登覽長如昨飛鴻影裏秋光薄
祇有黃花覺牢裏烏紗一任西風作

芳草渡

雙調五
十五字

芳草渡

馮延巳

梧桐落蓼花秋煙初冷雨纔收蕭條風物正堪愁人去

欽定四庫全書

御選歷代詩餘

卷二十九

後多少恨在心頭
燕鴻遠羌笛怨渺渺澄波一片山
如黛月如鉤笙歌散夢魂斷倚高樓

望遠行

又一體雙調
五十五字

望遠行

南唐李煜

碧砌花光照眼明
朱扉長日鎮長扃
餘寒欲去夢難成
爐香煙冷自亭亭
遼陽月秣陵砧
不傳消息但傳情
黃金臺下忽然驚
征人歸日二毛生

金鳳鈎

又一體雙調
五十五字

金鳳鈎

送春

晁補之

春辭我向何處怪草草夜來風雨一簪華髮少歡饒恨
無計殢春且住春回常恨尋無路試向我小園徐步
一闌紅藥倚風含露春自未曾歸去

木蘭花

又一體雙調
五十五字

木蘭花

韋莊

獨上小樓春欲暮，愁望玉關芳草路。
消息斷，不逢人，却斂細眉歸繡戶。
坐看落花空歎息，羅袂濕斑紅淚滴。
千山萬水不曾行，魂夢欲教何處覓。

步蟾宮

一名折月桂雙
調五十五字

步蟾宮

汪存

玉京此去春猶淺，正雪絮馬頭零亂。
姮娥翦就綠雲裳。

待來步蟾宮與換 明年二月桃花岸
雙槳浪平煙暖
揚州十里小紅樓
盡卷上珠簾一半

杏花天

又一體雙調
五十五字

杏花天

豫章
重午

侯寘

寶釵整鬢雙鸞鬪
睡初醒薰風襟袖綵絲皓腕宜清晝
更父虎衫兒新就
玉杯共飲菖蒲酒願耐夏宜春
厮守榴花故意添紅皺
映得人來越瘦

玉樓人

雙調五
十五字

玉樓人

晏殊

去年尋處曾持酒，又還是向南枝。
見後宜霜宜雪，精神沒些兒。
風味減舊，先春似與羣芳鬪。
度暗香不待頻，
鞦韆有人笑折歸來玉纖長。
儘露羅袖。

金蓮繞鳳樓

雙調五
十五字

金蓮繞鳳樓

宋徽宗

絳燭朱籠相隨映馳繡轂塵清香襯萬金光射龍軒瑩
繞端門瑞雷輕振元宵為開勝景嚴黼座觀燈錫慶
帝家華燕乘春興褰珠簾望堯瞻舜

徵招調中腔

雙調五
十五字

徵招調中腔

天寧節

王安中

紅雲舊霧籠金闕聖運叶星虹佳節繁榮曉風馥天香

奏九韶帝心悅
瑤階萬歲蟠桃結
睿筭永壺天風月
日觀幾時六龍來
金鏤玉牒告功業

鼓笛令

雙調五
十五字

鼓笛令

黃庭堅

寶犀未解心先透
惱煞人
遠山微皺
意淡言疎
情最厚
枉教作著行官柳
小雨勒花時候
抱琵琶為誰消瘦
翡翠金籠思珍偶
忽拚與山雞儔
憊

浪淘沙

又一體雙調
五十五字

浪淘沙

杜安世

又是春暮落花飛絮子規啼盡斷腸聲
秋千庭院紅旗彩索淡煙疎雨
念念相思苦黛眉長聚碧池驚散睡
鴛鴦當初容易分飛去恨孤負歡侶

前調

又一體

杜安世

簾外微風雲雨回蹤銀釭燼冷錦幃中
舊日深盟當年

心事隄頓成空
嶺外白頭翁更沒由逢
一牀鴛被疊
香紅明月滿庭花似繡
悶不見蟲蟲

涼州令

又一體雙調
五十五字

涼州令

柳永

夢覺紗牕曉殘燈闇然空照
因思人事苦縈牽離愁別
恨無限何時了
憐深定是心腸小
往往成煩惱一生
惆悵情多感月不長圓
春色易為老

思歸樂

雙調五
十五字

思歸樂

柳永

天幕清和堪宴聚相對盡高陽儔侶皓齒善歌長袖舞
漸引入醉鄉深處晚歲光陰能幾許這薄宦不須多
取共君把酒聽杜宇再三勸人歸去

憶人人

雙調五
十五字

欽定四庫全書

御選歷代詩餘

卷二十九

十三

憶人人

梅二首

晏殊

密傳春信微裝曉
豔淡浮香苞欲綻
臨風雖未吐芳心
奈暗露盈盈粉面
何人月下一聲長笛
即是飛英亂
憑闌莫惜賞芳姿
更莫待傾筐已滿

前調

晏殊

前村滿雪難尋幽豔
無奈清香漏綻煙梢
霜萼出牆時
似暗妬壽陽妝面
幽香浮動無緣攀賞
但只神魂亂
不辭他日醉瓊姿
又只恐陰成子滿

怨王孫

又一體雙調
五十五字

怨王孫 賞荷

宋媛
李清照

湖上風來波浩渺，秋已暮，紅稀香少。水光山色與人親，
說不盡無窮好。蓮子已成，荷葉老，清露洗蘋花汀草。
眠沙鷗鷺，不回頭應也，恨人歸早。

一七令

從一字至七字成調，一字則單句，二字至七字皆
雙句，即以起一字為本意而詠之，單調五十五字。

一七令

魏扶

愁迴野深秋生枕上起眉頭
閨閣危坐風塵遠遊巴猿
啼不住谷水咽還流送客泊舟入浦思鄉望月登樓煙
波早晚長羈旅絃管終年樂五侯

前調

楊慎

花搗錦鋪霞邀蝶隊聚蜂衙
金環漢女寶髻吳娃風前
香掩冉月下影交加曲水名園幾簇宜春下苑千家謝
傅金屏成坐笑陳朝瓊樹不須誇

前調

楊慎

風偃草飄蓬過竹院拂蘭叢柳堤搖綠花徑飛紅青釭
殘焰滅碧幌嫩涼通莊叟篇中竚賴蘭臺賦裏雌雄無
影迴隨仙客馭有情還與故人同

月照梨花

又一體雙調
五十五字

月照梨花

黃昇

畫景方永重簾花影好夢猶酣鶯聲喚醒門外風絮交

飛送春歸 修蛾畫了無人問
幾多別恨淚洗殘妝粉
不知郎馬何處嘶煙草淒迷鷓鴣啼

鵲橋仙

或加令字詞詠本意居多雙調五十六字又名廣寒秋取張輯詞中語也起句換頭亦有用韻者向體不分

鵲橋仙

歐陽修

月波清霽煙容明淡靈漢舊期還至
鵲迎橋路接天津
映夾岸星榆點綴雲屏未卷仙雞催曉腸斷去年情

味多應天意不教長恁恐把歡娛容易

前調

張先

星橋火樹長安一夜開
徧紅蓮萬蕊綺羅能借日中春
風露細天清似水
重城閉月青樓誇樂人在銀潢影裏
畫屏期約近收燈
歸步急雙鴛欲起

前調

蘇軾

縱山仙子高情雲渺不學癡牛
驂女鳳簫聲斷月明中
舉手謝時人欲去
客星曾犯銀河微浪尚帶天風海

雨相逢一醉是前緣風雨散飄然何處

前調

蘇軾

乘槎歸去成都何在萬里江沱漢漾與君各賦一篇詩
留織女駕鵲機上還將舊曲重賡新韻須信吾儕天
放人生何處不兒嬉看乞巧朱樓綵舫

前調

黃庭堅

朱樓綵舫浮瓜沉李報答春風幾許一年尊酒暫時同
別淚作人間曉雨駕鵲機綜能令儂巧也待乘槎仙

去若逢海上白頭翁共一訪癡牛騃女

前調

秦觀

纖雲弄巧飛星傳恨銀漢迢迢暗度金風玉露一相逢
便勝却人間無數柔情似水佳期如夢忍顧鵲橋歸
路兩情若是久長時又豈在朝朝暮暮

前調

李之儀

宿雲收盡纖塵不警萬里銀河低挂青冥風露不勝寒
無計學雙鸞並駕玉徽聲斷寶釵香遠空賦紅綾小

研庾郎知有幾多愁
怎奈向月明今夜

前調

毛滂

紅摧綠挫鶯愁蝶怨
滿院落花風緊
醉鄉好夢却慚騰
又冷落一時吹醒
柔紅不奈暗香猶好
覩著翻成不
忍春心減盡
眼常閒更肯被遊絲牽引

前調

毛滂

水精簾下沉香閣畔
新下紅油畫幕
百花何處避芳塵
便獨自將春占却
月華淡淡夜寒祿祿
猶把紅燈照

著醉時從醉不歸家緊守定不教冷落

前調

杜安世

日長天氣深深庭院又是春愁滋味池邊昨夜雨兼風
戰紅杏餘香亂墜陰陰亭榭暝煙輕柳萬縷黃金窵
地一雙新燕却重來但暗抱羅巾掩淚

前調 餞會

舒亶

教來歌舞接成桃李盡是使君指顧如今裝就滿城春
忍便擁雙旌歸去鶯聲巧轉花心爭吐無計可留君

住兩堤芳草一江雲早晚是西樓望處

前調

葛勝仲

鵲橋仙偶天津輕渡却笑嫦娥孤皎平時五夜似經年
問何事今宵便曉雲車將駕神夫留戀更吐心期多
少支機休浪與閒人莫倚賴芳心素巧

前調

葛勝仲

涼飈破暑清歌縈座缺月稀星庭戶瓜華草草具杯盤
喜共浥初筵清露天孫東處牽牛西望勸汝一杯清

醕精靈何必待秋通為一洗朦朧今古

前調

謝逸

蝶飛煙草鶯啼雲樹滿院垂楊陰綠輕風飄散杏梢紅
更吹皺池波如縠珠簾日晚銀屏人散樓上醉橫霜
竹一春若道不相思綠底事紅綃褪玉

前調

周邦彥

浮花浪蕊人間無數開偏朱朱白白瑤池一朵玉芙蓉
秋露洗丹砂真色晚涼拜月六銖衣動應被姮娥認

得翩然欲上廣寒宮橫玉度一聲天碧

前調

李祁

春陰淡淡春波渺渺簾捲花梢香霧小舟誰在落梅村
正夢繞清溪煙雨碧山學士雲房嬌小須要五湖同
去桃花流水鰕魚肥却趁得江天佳處

前調

呂渭老

西風木落薄衾孤枕記起花時些箇宿愁新恨兩關心
說道理分疏不可別愁如絮佳期何在古屋蕭蕭燈

火打窓風雨又何消夢未就依前驚破

前調

向子諲

澄江如練遠山橫翠一段風煙如畫層樓傑閣倚晴空
疑便是支機石下寶匳瓊鑑淡勻輕掃纖手弄妝初
罷擬將心事問天公與牛女平分今夜

前調

向子諲

飛雲多態涼颼微度都到酒邊歌處冰肌玉骨照人寒
更做弄一簾風雨同槩風味合歡情思不管星娥猜

如桃花溪水接銀河與占斷鵲橋歸路

前調

寒梅

趙長卿

溪清水淺霜明月淡玉破梅梢未徧寒枝纖瘦乃如無
但空裏飛花數片 乘風欲去凌波難駐惟見紅愁粉
怨夜深青女濕霓裳暗香在廣寒宮殿

前調

辛棄疾

小窗風雨從今便憶中夜笑談清軟啼鴉衰柳自無聊
更管得離人腸斷 詩書事業青氈猶在頭上貂蟬會

見莫貪風月臥江湖道日近長安路遠

前調

山行書
所見

辛棄疾

松岡避暑茅簷避雨閒去間來幾度醉扶怪石看飛泉
又却是前回醒處東家娶婦西家歸女燈火門前笑
語釀成千頃稻花香夜夜費一天風露

前調

贈鷺
鷺

辛棄疾

溪邊白鷺來吾告汝溪裏魚兒堪數主憐汝汝又憐魚
要物我欣然一處白沙遠浦青泥別渚剩有鰕跳鰕

舞聽君飛去飽時來看頭上風吹一縷

前調

范成大

雙星良夜耕慵織嬾應被羣仙相妬娟娟月姊滿眉顰
更無奈風姨吹雨相逢草草爭如休見重攪別離心
緒新歡不抵舊愁多倒添了新愁歸去

前調

張孝祥

黃陵廟下送君歸去水上船兒一隻離歌聲斷酒杯空
容易裏東西南北重湖風月九秋天氣冉冉新愁如

織我家住在楚江濱為頻寄雙魚素尺

前調

梅

張孝祥

吹香成陣飛花如雪不那朝來風雨可憐無處避春寒
但玉立仙衣數縷清愁萬斛柔腸千結醉裏一時分
付勸君不用歎飄零待結子成陰歸去

前調

趙彥端

來時夾道紅羅步障已換青絲翠羽春愁元自逐春來
却不肯隨春歸去千觴美酒十分幽事歸到只愁風

雨憑誰傳語牡丹花為做取東君些主

前調

秀野堂作

趙彥端

江梅仙去蠟梅風化只有細梅呈秀不知春在阿誰邊
試與問青青楊柳小園幽事中都風味鬪草分香如
舊東風莫漫送扁舟為管取輕寒羅袖

前調

送路勉道赴長樂

趙彥端

留花翠幕添香紅袖常恨情長春淺南風吹酒玉缸翻
便忍聽離絃聲斷乘鸞寶扇凌波微步好在清池涼

館直饒書與荔枝來問纖手誰傳冰盃

前調

紅白蓮

趙彥端

藕花塘上無塵無暑豔豔一池秋淨綠羅寶蓋碧瓊竿
翠浪裏亭亭月影 一家姊妹兩般梳洗濃淡施朱傅
粉夜深風露逼人寒問誰在牙牀酒醒

前調

管鑑

中秋過了重陽將近正是一年佳處橙黃橘綠總尋常
看丹桂餘香再吐 胸中星斗筆端風雨定約蟾宮高

步賜袍賜帶玉爐熏共歲歲斑衣戲舞

前調

菱

張鎡

連汀接漱縈蒲帶藻萬鏡香浮光滿濕煙吹霽木蘭輕
照波底紅嬌翠婉玉纖採罷銀籠攜去一曲山長水
遠綵鴛雙慣貼人飛恨南浦離多夢短

前調

陸游

華燈縱博雕鞍馳射誰記當年豪舉酒徒一半取封侯
獨去作江邊漁父輕舟八尺低篷三扇占斷蘋洲煙

雨鏡湖元自屬閒人又何必官家賜與

前調

陸游

一竿風月一蓑煙雨家在釣臺西住賣魚生怕近城門
況肯到紅塵深處潮生理櫂潮平繫纜潮落浩歌歸
去時人錯把比嚴光我自是無名漁父

前調

夜聞
杜鵑

陸游

茅簷人靜蓬牕燈暗春晚連江風雨林鶯巢燕總無聲
但月夜常啼杜宇催成清淚驚殘孤夢又揀深枝飛

去故山猶自不堪聽況半世飄然羈旅

前調

楊炎

思歸時節乍寒天氣總是離人愁緒夜來無奈被西風
更吹做一簾秋雨征衫拂淚闌干倚醉羞對黃花無
語寄書除是鴈來時又只恐書成鴈去

前調

壽稼軒

楊炎

築成臺榭種成花柳更又教成歌舞不知誰為帶湖仙
收拾盡壺天風露閒中得味酒中得趣只恐天還也

妒青山縱買萬千重遮不斷詔書來路

前調

張輯

杯行將半月來猶未瀟灑水亭無暑清宵數客一欄秋
對冰雪荷花似語雄邊臺上文遊臺上咫尺紅雲容
與天風吹送廣寒秋正畫舸湖光佳處

前調

謝懋

鈎簾借月染雲為幌花面玉枝交映涼生河漢一天秋
問此會今宵孰勝銅壺尚滴燭龍已駕淚浥西風不

盡明朝烏鵲到人間試說向青樓薄倖

前調

湖上次韻

黃機

黃花似鈿芙蓉如面秋事淒然向晚風流從古記登高
又處處悲絲急管有愁萬斛有才八斗慷慨時驚俗
眼明年一笑復誰同料天遠爭如人遠

前調

黃機

一番雨過江頭綠漲催喚扁舟解去重來言語縱堪憑
怎得似而今且住陽關聲斷同心未綰綬綬淚珠無

數秋鴻春燕往還時莫忘了錦牋分付

前調

留別

劉光祖

相逢一笑又成相背南鴈歸時霜透明朝人在短亭西
看舞袖雙雙行酒歌聲此處秋聲何處幾度亂愁搔
首如何不寄一行書有萬緒千端別後

前調

七夕舟中

史達祖

河深鵲冷雲高鷺遠水珮風裳縹緲却推離恨下人間
第一箇黃昏過了舟行有限愁來無限去去長安漸

杳應將巧思入相思覺淚比銀灣較少

前調

吳潛

扁舟乍泊危亭孤嘯目斷閒雲千里前山急雨過溪來
盡洗却人間暑氣暮鴉木末落鳬天際都是一番秋
意癡兒騃女賀新涼也不道西風又起

前調

趙以夫

翠鈿心事紅樓歡宴深夜沉沉無暑竹邊荷外再相逢
又還逐浮雲飛去錦箋尚濕珠香未歇空惹閒愁千

縷尋思不似鵲橋人猶自得一年一度

前調

盧炳

餘霞散綺明河翻雪隱隱鵲橋初結牛郎織女乍逢迎
却勝似人間歡悅一宵相會經年離別此語真成浪
說細思怎得似嫦娥常獨宿廣寒宮闕

前調

沈端節

懷人意思悲秋情緒長是文園病後蛛絲輕裊玉釵風
想花貌參差依舊無窮往事一襟新恨老淚淋漓浪
戾

酒天涯相對話平生
悵南北還如算斗

前調

潘牂

青林雨歇珠簾風細
人在綠陰庭院
夜來能有幾多寒
已瘦了梨花一半
寶釵無據玉琴難托
合造一襟幽怨
雲牕霧閣事茫茫
試與問杏梁雙燕

前調

寄妹

宋媛
蘇氏

星移斗轉玉蟾西下
漸覺東郊向曉
馬嘶人語發霜林
望千里長安古道
珠宮姊妹相逢方信
別後十分瘦

了上林歸去正花時爭奈向花前又老

前調

邵齊席
上賦

宋妓嚴藥

碧梧初墜桂香才吐池上水花微謝穿針人在合歡樓
正月露玉盤高瀉蛛忙鵲嬾耕傭織倦空作古今佳
話人間剛道隔年期怕天上方纔隔夜

前調

元好問

梨花春暮垂楊秋晚歸袖無人重挽浮雲流水十年間
算只有青山在眼風臺月榭朱脣檀板多病全疎酒

蓋劉郎爭得似當年比前度心情更減

前調

喜雨

劉因

紆千生處幾時飛去欲去被天留住野人得飽更無求
滿意看一犁春雨田家作苦濁醪釀黍準備歲時歌
舞不妨分我一豚蹄更試聽今秋社鼓

前調

曹伯啓

杜鵑聲訴鷓鴣聲助催上黔陽歸路輕舟短棹泛滄浪
霽兩袖夜郎煙霧雲山如暮灘流如怒石齒蘄然無

數天涯愁緒不堪論這光景能消幾度

前調

詠梅
贈人

張 埜

瓊枝纖弱瑤英嬌小占得江南春早前村雪裏欲開時
料未必東風知道芳心一點幽香多少幾度被花相
惱隴頭人去早歸來莫直待春殘鶯老

前調

滕 賓

斜陽一抹青山數點萬里澄江如練蕭風吹落櫓聲遙
又喚起寒雲片片殘鴉古渡瘦驢村店漸覺樓頭人

遠桃花流水小橋東是那箇柴門半掩

前調

周用

清淮擊楫海潮傳信天末長風初起中宵戍鼓聽鳴鼉
問候吏郵籤報水計程南北天涯歸夢枕上迢迢千
里青綾坐擁奈風寒消不得鬢絲千縷

前調

周用

聞香妙語心清無限更惹御爐香暖登登寶殿許瞻天
來供奉玉皇香案細滴銅壺響傳銀箭一夜五更將

半雲屏起攬薄羅衣秋影轉鵲橋星漢

前調

感悟

董斯張

輕暖輕寒不晴不雨辜負韶光九十落花飛絮兩無情
仗千尺遊絲作合塗抹東西飄零南北從此扁舟一
葉夢回始覺未歸休恨一點窺人明月

前調

漁父

沈士鏞

澄潭集網寒江垂線雪白鱸魚成串西風吹送酒花香
促步向壚頭索換竹篙枕月蓑衣遮面一曲滄浪天

半乾坤水上最清閒也自分煙波占斷

前調

明媛
項蘭貞


秋葉辭桐虛庭受月漫道雙星踐約人間離合總難憑
空對景靜占靈鵲遙想停梭此時相晤可把別愁訴
却瑤堦獨立且微吟覩瘦影薄羅輕綽

前調

明妓
王微

萋萋閒霞輜輶蔽月曾赴書生密約人間較得合歡頻
又何事凌波盼鵲一隻鳴機千年舊樣也合從新換

却織成綃素不裁襦愛鄰近霓裳袖綽



欽定四庫全書

御選歷代詩餘
卷二十九

三十一

選歷代詩餘卷二十九